



Korisne lekcije iz ramazanske škole (Meka)

Hatib: dr. Bender ibn Abdulaziz Belile

5. ramazan 1445. po Hidžri / 15. mart 2024.

Hvala Allahu, Onome Koji je dostojan hvale i obožavanja, i Čija pomoć i podrška prate Njegove pokorne robove. Svjedočim da nema boga osim Allaha, Jedinog, Koji nema druga, istinitim svjedočenjem, kojim Mu iskreno potvrđujem jednoću, i svjedočim da je Muhammed, sallallahu alejhi ve sellem, Njegov rob i poslanik, koga je On poslao, nakon što je neko vrijeme prekinuto poslanstvo, pa je njime uputio Svoje robove na Pravi put, neka su na njega, na njegovu porodicu, ashabe i one koji ih slijede Allahova milost, spas i blagoslov.

O ljudi, oporučujem sebi i vama bogobožnost, koja je put sreće i putokaz vođstva. "O vjernici, bojte se Allaha, i budite s onima koji su iskreni." (Et-Tevba, 119)

O muslimani, svojim sjajem i miomirisima natkrilio nas je mjesec ramazan. Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: "Kada nastupi ramazan, otvore se džennetske kapije, a zatvore džehennemski vrata, i šejtani se sputaju." (Buhari i Muslim)

Ramazan dolazi ljudima kako bi njihova srca ispunio dobrom, u njihovim dušama probudio "zaspale" osjećaje dobročinstva, u njihovim umovima izbistrio razloge za čvršće povezivanje s Allahom i njihovoj prirodi vratio izvornu čistoću i plemenitost.

Ramazan je "trening" za dušu, kroz njeno odricanje od prohtjeva i uzdizanje ka nebesima, i povezivanje imućnih i siromašnih samilošću i saosjećanjem.

O vjernici, glava dobrih djela u ramazanu je post. Istiniti kaže: "O vjernici propisuje vam se post, kao što je bio propisan onima prije vas, da biste se grijeha klonili." (El-Bekara, 183)





Prvi plod posta je postizanje bogobožnosti. A, zar on nije dovoljan? Postač ubire ovaj plod zahvaljujući sputavanju svojih prohtjeva, poniznosti pred Allahom, nadvladavanju strasti i odbacivanju arogancije i oholosti.

Allah je uzvisio poziciju posta i za njega pripremio veliku nagradu. Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: "Svako čovjekovo djelo nagrađuje se višestruko, od deset do sedam stotina puta, a Allah je rekao: 'Osim posta, On je moj, i Ja za njega nagrađujem, jer postač ostavlja svoje prohtjeve i hranu radi Mene.'" (Buhari i Muslim)

U Džennetu se nalaze posebna vrata na koja će ući postači, i niko osim njih neće ući na ta vrata. Sehl ibn Sa'd, radijallahu anhu, prenosi da je Allahov Poslanik, sallallahu alejhi ve sellem, rekao: "U Džennetu imaju vrata koja se zovu Rejjan, na koja će, na Sudnjem danu, ući postači, i niko osim njih neće ući na ova vrata. Kada oni uđu, zatvorit će se, i niko više neće moći ući." (Buhari i Muslim)

Jedna od najvećih koristi "škole posta" jeste postizanje iskrenosti i duboke svijesti o Allahu i Njegovom nadzoru. Post je tajni ibadet, za koji ne zna niko osim Allaha, pa se njegovi efekti prenose na dušu postača, njegovo stanje i situacije.

U ramazanu se uči Kur'an, i izgovara usnama danju i noću, a kako i ne bi kada je ramazan mjesec Kur'ana, u njemu je počelo njegovo objavljivanje Vjerovjesniku, sallallahu alejhi ve sellem: "U mjesecu ramazanu počelo je objavljivanje Kur'ana, koji je putokaz ljudima i jasan dokaz Pravoga puta i razlikovanja dobra od zla." (El-Bekara, 185)

Poslanik, sallallahu alejhi ve sellem, sastajao se s Džibrilom svake noći ramazana, pa ga je on podučavao Kur'anu. (Buhari i Muslim)

Ramazan je mjesec noćnog namaza, kijama, stajanja pred Allahom. Vjerovjesnik, sallallahu alejhi ve sellem, garantovao je onome ko u ramazanu bude klanjao noćni namaz, s čvrstom vjerom u Allaha i nadom u Njegovu nagradu, da će mu biti oprosteni grijesi. Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: "Ko u ramazanu bude klanjao noćni namaz





(teraviju), s čvrstom vjerom u Allaha i nadom u Njegovu nagradu, bit će mu oprošteni prošli grijesi." (Muttefekun alejhi)

Allah podario i meni i vama blagoslov u časnom Kur'anu, i molim Ga da i meni i vama podari da nam budu od koristi njegovi ajeti i mudra opomena. Rekoh ovo što ste čuli, i molim Allaha da i meni i vama i svim muslimanima oprost i sve grijehe, On mnogo prašta i milostiv je.

O vjernici, Allah vas je u ovom mjesecu počastio veličanstvenim i plemenitim darovima, i onaj ko ne ostvari "dobit" u "mjesecu dobiti", pa kad će ostvariti? Ako u njemu ne uveća svoja dobra djela, pa kad će uspjeti? Ako se ne pokaje svome Gospodaru, koliko će još odgađati, i kad se misli popraviti? U hadisu se kaže: "Neka je ponižen čovjek koji dočeka ramazan, a zatim on završi, a ne bude mu oprošteno!" (Ahmed i Tirmizi)

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

